

# ՏՅԱՌՆԸՆԴԱՌԱՋ

*«Երբ նրանց սրբազորման օրերը լրացան, Մովսեսի օրենքի համաձայն Նրան Երուսաղեմ քաղաքում Տիրոջը ներկայացնելու համար, ինչպես գրված էր Տիրոջ օրենքում. «Ամեն արու զավակ, որ արգանդ է բացում, Տիրոջ համար սուրբ պիտի կոչվի»:  
(Ղուկ. Բ 22)*

Տայ Առաքելական Եկեղեցին, նախնի Եկեղեցու հաստատած կարգի համաձայն, ամեն տարի փետրվարի 14-ին՝ Քրիստոսի հրաշափառ Ծննդից 40 օր հետո, մեծ հանդիսավորությամբ նշում է քառասուն օրական Փրկչին Երուսաղեմի տաճարին ընծայաբերելու տոնը՝ Տյառնընդառաջը: «Տյառնընդառաջ» նշանակում է «Տիրոջն ընդառաջ գնալ» կամ «Տիրոջն ընդառաջ դուրս գալ»: Տոնի խորհուրդը Տիրոջն ընդառաջ գնալու հրավերն է: Եվ ինչպես Նա՝ Քրիստոս, խոնարհվեց ու դեպի մեզ եկավ՝ մեր փրկության համար, այդպես էլ մենք պետք է գնանք Նրան ընդառաջ: Այս տոնը ժողովրդի մեջ հայտնի է նաև Տերնդեզ, Տրնդեզ և այլ անուններով, որոնք «Տերն ընդ ձեզ» արտահայտության փոփոխված տարբերակն են:

## ՔՐԻՍՏՈՍԻ ԸՆԾԱՅՈՒՄԸ ՏԱՃԱՐԻՆ

Մովսիսական օրենքի համաձայն, երբ լրանում է Աստվածորդու Ծննդյան ութերորդ օրը, Նրան թլփատում են և, ինչպես Գաբրիել հրեշտակապետն էր պատվիրել, անվանում Յիսուս (Ղուկ. Ա 31): Այնուհետև, ինչպես Օրենքն էր թելադրում մայրերի մաքրագործման և առաջնածիններին Աստծուն նվիրաբերելու մասին, Յովսեփն ու

Մարիամը Բեթղեհեմում 40 օր մնալուց հետո վերցնում են մանուկ Յիսուսին և գնում Երուսաղեմ՝ Նրան «Տիրոջը ներկայացնելու» (Ղուկ. Ա 22): Սրբազան ավանդության համաձայն՝ երբ տեղ են հասնում, տաճարի արևելյան դուռը, որն Աստծո հրամանով փակված էր, բացվում է՝ համաձայն Աստծո խոսքի՝ ասված Եզեկիել մարգարեի միջոցով. «Այդ դուռը փակ է մնալու ու չի բացվելու, նրանով ոչ ոք չի անցնելու, որպեսզի Իսրայելի Տեր Աստվածը մտնի այնտեղով ... Նա մտնելու է դռան կամարի տակի ճանապարհով և նույն տեղով էլ դուրս է գալու» (Եզեկիել ԽԴ 1-3):

Երբ տաճարի դռներն աղմուկով բացվում են, քաղաքում մեծ դղրոյուն է բարձրանում: Երուսաղեմի բնակիչները ջահերով ու լապտերներով շտապում են դեպի տաճար և տեղ հասնելով՝ տեսնում մանուկ Յիսուսին ծնողների հետ:

## ՄԱՅՐԵՐԻ ՄԱՔՐԱԳՈՐԾՄԱՆ ԵՒ ՄԱՆՈՒԿՆԵՐԻՆ ՏԱՃԱՐԻՆ ԸՆԾԱՅԵԼՈՒ ԿԱԳԸ ՀԻՆ ԿՏԱԿԱՐԱՆՈՒՄ

Համաձայն Մովսիսական օրենքի, երբ որևէ կին զավակ էր ծնում, որոշ ժամանակ անմաքուր էր համարվում: Եթե նորածինը տղա էր, նրան ութերորդ օրը թլփատում էին և անվանակոչում: Այնուհետև մայրը ևս 33 օր պետք է սպասեր, իսկ եթե ծնվածը աղջիկ էր, ապա՝ 80 օր, մինչև լրանային մաքրության համար սահմանված օրերը: Այս օրերի լրանալուց հետո ծնողները տաճար էին գնում ու մեկ տարեկան մի գառ տանում՝ ողջակեզի, մի զույգ աղավմի կամ տատրակ էլ՝ մեղքերի քավության համար: Իսկ եթե ծնողները աղքատ էին, ինչպես Յիսուսի պարագայում էր, նրանք պետք է 2 տատրակ կամ աղավմու 2 ձագ ընծայաբերեին՝ մեկը ողջակեզի, իսկ մյուսը՝ մեղքերի քավության համար (Ղևտ. ԺԲ):

Հին Կտակարանում հատուկ օրենք կար անդրանիկ արու զավակների համար: Աստված, եգիպտացիների բոլոր անդրանիկ զավակներին կոտորելուց հետո (Ելք ԺԲ 29-30) Մովսեսին պատվիրում է. «Ինձ նվերաբերիր բոլոր խաբայեացիների անդրանիկ զավակներին» (Ելք ԺԳ 1-2): Սակայն երբ Մովսեսը որոշ ժամանակ անց բարձրանում է Սինալեռը՝ պատվիրանները բերելու, հրեաները մոռանում են Աստծուն և իրենց համար ոսկե հորթ պատրաստում նրան պաշտելու համար: Ըստ Մովսեսին տրված աստվածային հրամանի՝ Ղևիի որդիների ձեռքով ժողովուրդը պատժվում է (Ելք ԼԲ 26-29): Այդ պատճառով Աստված պատվիրում է Մովսեսին Ղևիի որդիներին առանձնացնել Իրեն ծառայելու համար, իսկ մնացյալ անդրանիկները, որոշակի փրկագին վճարելով, ազատվում էին այս ծառայությունից:

Մարիամի և Հիսուսի համար տաճար գալը զուտ օրենքի գործադրություն էր: Նրանք ենթակա չէին օրենքին: Ս. Աստվածածնի պարագայում այս օրենքն անհիմաստ էր, քանի որ նրանից Ծնվածը՝ Հիսուսը, հղացվել էր Սուրբ Հոգուց և Ս. Աստվածածինը չունեի սրբագործվելու խորհրդի կատարման անհրաժեշտություն, ինչպես սովորական կանայք: Հիսուսն Աստծու Միածին Որդին է, Հոր անդրանիկ ծնունդը ժամանակից դուրս՝ հավիտյանս հավիտենից, և Մարիամի անդրանիկ ծնունդը ժամանակի մեջ: Եվ Նա տաճար էր բերվում Իր իսկ սահմանած օրենքը կատարելու (ինչպես և թլփատության դեպքում էր)՝ դրանով հաստատելով Իր ճշմարիտ մարդեղությունը: Նաև՝ օրինակ էր տալիս հնազանդության ու խոնարհության, հաստատում օրինավորության անհրաժեշտությունը և մերժում օրինազանցությունը:

## ՄԻՄԵՈՆ ԾԵՐՈՒՆՈՒ ԵՒ ԼՆՆԱՅԻ ՄԱՐԳԱՐԵԱՅՈՒՄՆ ՈՒ ՕՐՀՆՈՒԹՅՈՒՆԸ

Ըստ Ղուկասի ավետարանի, երբ Մարիամն ու Հովսեփը տաճար են մտնում, նրանց ընդառաջ է գալիս Սիմեոն ծերունին: Համաձայն ավանդության՝ Սիմեոնը Եգիպտոսի Պտղոմեոս թագավորի հրամանով Ալեքսանդրիայում մասնակցել էր Հին Կտակարանի գրքերը երրայերենից հունարենի վերածելու «Յոթանասնից» թարգմանությանը: Թարգմանությունը կատարելու ժամանակ Սիմեոնը Եսայու գրքում հանդիպում է «Ահա կույսը պիտի հղանա ու որդի ծնի» (Եսայի է 14) նախադասությանը, մտածում է, թե շատերը թերևս չեն հավատա այս խոսքին, և ջնջում է այն: Որոշ ժամանակ իր արածի մասին մտորելուց հետո շուտով նիհիում է, իսկ երբ արթնանում է, տեսնում է որ այն հատվածը, որը նա ջնջել էր, ոսկե տառերով նորից գրվել էր նույն տեղում: Սիմեոնը փառաբանում է Աստծուն և երանի տալիս նրանց, ովքեր ականատես պետք է լինեին այդ դեպքին: Աստծո Սուրբ Հոգին, տեսնելով Սիմեոնի հավատքը, ասում է. «Մահ չես տեսնի, մինչև տեսնես Տիրոջ Օծյալին»: Եվ երբ Սիմեոնը «Հոգով առաջնորդված» տաճար է գնում և տեսնում Հիսուսին, օրհնում է Աստծուն. «Այժմ, ո՛վ Տեր, խաղաղությամբ արձակիր Քո ծառային ըստ Քո խոսքի, որովհետև աչքերս տեսան փրկությունը Քո, որ պատրաստեցիր բոլոր ժողովուրդների առաջ» (Ղուկ. Բ 29-31): Այնուհետև Սիմեոն ծերունին Հիսուսին հանձնում է մորը և, ավանդության համաձայն, հենց տաճարում էլ ավանդում հոգին:

Ավետարանը պատմում է, որ Հիսուսին տաճարին ընծայելու ժամանակ այնտեղ էր գտնվում նաև Աննա անունով մի մարգարեուհի: Նա ութսունչորսամյա աստվածավախ կին էր, և «չէր հեռանում տաճարից, այլ պահքով

ու աղոթքով գիշեր-ցերեկ ծառայում էր Աստծուն» (Ղուկ. Բ 37): Աննան ևս օրհնաբանում է Աստծուն և խոսում Յիսուս մանկան մասին նրանց հետ, ովքեր սպասում էին Երուսաղեմի փրկությանը:

Համաձայն Եկեղեցու հայրերի բացատրության, Սիմեոնը և Աննան խորհրդանշում են Փրկչին ընդառաջ դուրս եկած Հին Ուխտի ողջ մարդկությանը:

Քառասուն օրական մանուկներին տաճար տանելու և Աստծուն ընծայաբերելու հինկտակարանյան օրենքը նոր շունչ ստացավ և պահպանվեց նաև քրիստոնյաների մեջ: Յուրաքանչյուր ընտանիքում երբ երեխա է ծնվում, մեր Եկեղեցու հայրերի հաստատած կարգի համաձայն՝ ծնողները նրան ծննդյան քառասուններորդ օրը եկեղեցի պետք է տանեն, ուր կատարվում է հատուկ ծես՝ քառասուն օրական մանուկների ընծայման կարգ:

### **ՏՅԱՒԸՆԴԱՌԱՋԻ ԾԻՍԱԿԱՆ ԿԱՐԳԸ ԵՒ ԽՈՐՀՈՒՐԴԸ**

Տոնի ծիսական արարողություններն սկսվում են փետրվարի 13-ի երեկոյան ժամերգութամբ, այնուհետև կատարվում է նախատոնակ, որի ժամանակ երգվում է «Լույս զվարթ» շարականը: Նախատոնակի արարողությունը սկսվում է եկեղեցում ջահեր, մոմեր կամ ճրագներ վառելով, որպես օրհնակ Քրիստոսի՝ երեկոյան ժամին տաճար գալու: Հավատացյալները տոնին մասնակցում են ձեռքներին օրհնված մոմեր պահած, որոնք արարողության ավարտին վառում են եկեղեցու կանթեղներից և տանում տները: Այս ամենը կարծես լույսի տոնախմբություն է հիշեցնում՝ խորհրդանշելով Սիմեոնի՝ Յիսուսին տված

«Լույս» անունը: Օրվա ավետարանական ընթերցվածը նվիրված է քառասուն օրական Յիսուսի՝ տաճար գալուն: Կատարվում է նաև անդաստանի արարողություն: Առավոտյան ժամերգության ժամանակ եկեղեցու չորս կողմերում՝ հյուսիսում, հարավում, արևելքում, արևմուտքում, կարդացվում են չորս ավետարաններից հատվածներ:

**ԽԱՐՈՒՅՎ ՎԱՌԵԼԸ** և նրա շուրջ պտտվելը կամ վրայից թռչելը Տյառնընդառաջի տոնի ժողովրդական ավանդույթներից է: Տոնի նախորդ օրը՝ երեկոյան, եկեղեցու բակում խարույկ են վառում, որից վառած կրակով խարույկ էին վառում նաև տների բակերում:

Տյառնընդառաջի տոնի խարույկը, սակայն, այլ իմաստ ու խորհուրդ ունի: Նախ, ինչպես Գրիգոր Տաթևացին է բացատրում, ջահեր վառելը խորհրդանշում է Երուսաղեմի բնակիչների՝ քառասուն օրական Յիսուսին ջահերով ու ճրագներով ընդառաջ դուրս գալը, որի օրհնակով և քրիստոնյաներն են տոնի օրը ջահեր ու մոմեր վառում և Տիրոջ գալստյան նախատոնակը կատարում: Միմյանց օրհնած մոմեր բաժանելու սովորույթը խորհրդանշում է իմաստուն կույսերի յուղը (Մատթ. ԻԵ 1-13): Իսկ խարույկ վառելու, դրա վրայից թռչելու կամ շուրջը պտտվելու սովորույթը խորհրդանշում է, որ եթե հեթանոսները կրակը որպես աստված էին պաշտում, ապա քրիստոնյաները կրակը, որպես Աստծու ստեղծագործություն, Աստծուն են մատուցում, Ով եկավ «երկրի վրա կրակ զցելու» (Ղուկ. ԺԲ 49)՝ ի Քրիստոս մկրտվողներին մյուսներից բաժանելու: Եթե հեթանոսներն Աստծու պատիվը կրակին էին տալիս, ապա քրիստոնյաները կրակը, որպես Քրիստոսի ծառա, բերում են Նրան ծառայեցնելու: Կրակի վրայից թռչելով՝ ոտնակոխ է արվում այն՝ ցույց տալով, որ այն աստված չէ, այլ Նա է Աստված, Ով քառասուն օրական եկավ տաճար և

երկրորդ անգամ է գալու աշխարհ: Այդ ժամանակ կրակը  
Նրա առջևից է գնալու:

Տյառնընդառաջի տոնը Տիրոջն ընդառաջ գնալու  
հրավեր է բոլորին: Քրիստոսը՝ Աստծո Միածին Որդին,  
երկնքից խոնարհվեց և մեր փրկության համար աշխարհ  
եկավ: Սա աստվածային սիրո գերագույն դրսևորումն է  
Արարչից հեռացած մարդու հանդեպ: Մարդացած Աստ-  
վածորդին ամեն պահ դիմում է մեզ. «եկե՛ք Ինձ մոտ, բոլոր  
հոգնածներդ ու բեռնավորվածներդ, և ես ձեզ կհանդատեմ»  
(Մատթ. ԺԱ 28): Հաջորդ քայլը մերն է: Յուրաքանչյուրս  
պետք է անսանք Տիրոջ ծայնին, քանզի ով Նրա հետևից  
է գնում, «խավարի միջով չի քայլի, այլ կընդունի կյանքի  
լույսը» (Հովհ. Ը 12):

Ամենայն հայոց կաթողիկոս Գարեգին Բ-ի հրահանգով  
արդեն մի քանի տարի է, ինչ Տյառնընդառաջը հռչակվել  
է նաև **նորապսակների օրհնության օր**, որպեսզի նո-  
րաստեղծ ընտանիքները Տիրոջն ընդառաջ գնալով՝  
«կյանքի լույսը ընդունեն» ու «չսայթաքեն» (Հովհ. ԺԱ 9):

Թող Աստծո ամենագոր Աջը միշտ հովանի և  
պահապան լինի բոլոր նորապսակներին ու  
ընտանիքներին: Ամեն:



ՀԱՅ ԱՌԱՔԵԼԱԿԱՆ ՍՈՒՐԲ ԵԿԵՂԵՅԻ  
ՔԱՐՈՉՉԱԿԱՆ ԿԵՆՏՐՈՆ  
ՄԱՅՐ ԱԹՈՒ ՍՈՒՐԲ ԷԶՄԻԱՇՆԻ ՏՊԱՐԱՆ